

ԿԱՐԾԻՔ

ՊԱՇՏՈՆԱԿԱՆ ԸՆԴԴԻՄԱԽՈՍԻ

Սամվել Զալիբեկի Կրոյանի « Հայաստանի Հանրապետության գյուղատնտեսական նշանակության հողատեսքերի կադաստրային գնահատումը՝ հողերի անթրոպոգեն փոփոխությունների ուսումնասիրությունների արդյունքներով» թեմայով դոկտորական ատենախոսության վերաբերյալ, որը ներկայացվել է Ե Ե 23.06 «Գեոդեզիա ներառյալ քարտեզագրություն և կադաստր» մասնագիտությամբ տեխնիկական գիտությունների դոկտորի գիտական աստիճանի հայցման համար

Ատենախոսության թեմայի արդիականությունը կասկած չի հարուցում, քանի որ այն առնչվում է Հայաստանի Հանրապետության համար ռազմավարական նշանակություն ունեցող հիմնախնդրի՝ հողային ռեսուրսների արդյունավետ կառավարման, պահպանման և գնահատման հետ: Աշխատանքում ներկայացված է, որ հանրապետության հողային ֆոնդը սահմանափակ է, մինչդեռ անթրոպոգեն ազդեցությունների հետևանքով հողերի դեգրադացիան շարունակում է խորանալ, ինչը դարձնում է կադաստրային գնահատման կատարելագործման անհրաժեշտությունը առաջնահերթ խնդիր:

Ատենախոսության նպատակն է իրականացնել գյուղատնտեսական նշանակության հողերի կադաստրային գնահատում՝ հիմնվելով դրանց հատկությունների անթրոպոգեն փոփոխությունների համակողմանի վերլուծության վրա: Նպատակի իրականացման համար առաջադրված են հստակ խնդիրներ՝ ներառյալ հողերի դասակարգման կատարելագործումը, անթրոպոգեն ազդեցությունների գնահատումը, կադաստրային և շուկայական արժեքների համեմատական վերլուծությունը և գնահատման մեթոդների զարգացումը:

Ատենախոսության մեթոդաբանական հիմքը գիտականորեն լավ մշակված է: Այն հիմնված է կադաստրային գնահատման գործընթացում շուկայական արժեքի կիրառման վրա՝ որպես համընդհանուր և համադրելի ցուցանիշ: Այս մոտեցումը թույլ է տալիս գնահատման արդյունքները մոտեցնել իրական տնտեսական պայմաններին և կիրառվում է նաև Հայաստանի Հանրապետությունում գյուղատնտեսական հողերի գնահատման համակարգում: Հաշվի է առնվում, որ գնահատման տվյալները փոփոխվում են մարդածին, տնտեսական և այլ գործոնների ազդեցությամբ, ինչի հետևանքով կադաստրային արժեքը կարող է հետ մնալ շուկայականից: Այդ պատճառով նախատեսվում է գնահատման պարբերական վերանայում՝ մոտավորապես յուրաքանչյուր հինգ տարին մեկ՝ ապահովելու արդիականություն և կառավարման արդյունավետություն:

Գնահատման մեթոդները հարմարեցված են Հայաստանի բնական և տնտեսական պայմաններին և հիմնված են իրավական կարգավորումների վրա: Հիմքում դրված է հաշվարկային մաքուր եկամտի մոտեցումը, որն իրականացվում է կադաստրային շրջանայնացման և հողերի խմբավորման հիման վրա՝ ապահովելով տնտեսական և որակական ցուցանիշների համապատասխանություն:

Մեթոդաբանությունը ներառում է նաև միջազգային փորձի համադրություն, որտեղ լայնորեն կիրառվում է շուկայական արժեքի վրա հիմնված մոտեցումը՝ բարձրացնելով գնահատման ճշգրտությունն ու արդյունավետությունը:

Ատենախոսության գիտական նորույթը պայմանավորված է մի շարք կարևոր արդյունքներով, որոնցից կարելի է առանձնացնել՝

- Հանրապետության հողատեսքերի դասակարգման և անվանաման նոր մոտեցումներ՝ համաձայն միջազգային WRB համակարգի:
- Անթրոպոգեն գործոններով պայմանավորված հողի հիմնական հատկությունների փոփոխության ուղղությունները:
- Գյուղատնտեսական հողերի դասակարգման բարելավված մեթոդներ:
- Հայաստանի Հանրապետության հողային կադաստրային գոտիավորման նոր քարտեզ սխեմա:
- Հողի որակական գնահատման՝ բոնիտիրովկա, արդյունքներ:
- Շուկայական և կադաստրային հողերի արժեքների համեմատական տվյալներ:

Ատենախոսության գործնական նշանակությունը ակնհայտ է: Ստացված արդյունքները կարող են կիրառվել պետական կառավարման համակարգում՝ հողային ռեսուրսների արդյունավետ օգտագործման, հարկման քաղաքականության բարելավման, ինչպես նաև տարածքային զարգացման ծրագրերի մշակման գործընթացներում:

Աշխատանքը կառուցված է տրամաբանական հաջորդականությամբ և ընդգրկում է ներածություն, հինգ գլուխ, եզրակացություններ և առաջարկություններ, գրականության ցանկ և հավելվածներ: Աշխատանքում ներկայացված են բազմաթիվ քարտեզներ, աղյուսակներ և վերլուծական նյութեր, որոնք բարձրացնում են հետազոտության գիտական արժեքը: Առաջին գլխում կատարված է հողի ուսումնասիրվածության աստիճանի համակողմանի վերլուծություն, ներկայացված են ինչպես հայրենական, այնպես էլ արտասահմանյան գիտական աշխատանքների վերլուծություն: Երկրորդ գլխում քննարկվում են հողերի դասակարգման հարցերը՝ միջազգային WRB համակարգի համադրմամբ: Երրորդ գլխում մանրամասն ներկայացված է անթրոպոգեն գործոնների ազդեցությունը հողերի վրա:

Չորրորդ և հինգերորդ գլուխներում ներկայացված են կադաստրային շրջանացման, խմբավորման և գնահատման մեթոդները և դրանց կիրառման արդյունքները:

Ատենախոսությունը աչքի է ընկնում իրականացման գիտական բարձր մակարդակով, տեսական և կիրառական բաղադրիչների համադրությամբ, ինչպես նաև լայնածավալ փաստական նյութի ներգրավմամբ: Հեղինակը ցուցադրել է թեմայի խոր իմացություն և ժամանակակից մոտեցումների կիրառման կարողություն:

Բարձր գնահատելով կատարված աշխատանքը, միևնույն ժամանակ, անհրաժեշտ է նշել մի շարք դիտարկումներ և դիտողություններ՝

Բովանդակային բնույթի դիտարկումներ և դիտողություններ

1. Ներածության մեջ նպատակն ու խնդիրները ներկայացված են հստակ, սակայն հետազոտության տեսական հիմնավորումը կարելի էր առավել ընդլայնել՝ ընդգրկելով հողագիտության և կադաստրային գնահատման ժամանակակից տեսական մոդելների համադրություն:
2. Որոշ բաժիններում (հատկապես դասակարգման և միջազգային փորձի ներկայացման ժամանակ) նկատվում է նկարագրական մոտեցման գերակշռում՝ առանց բավարար վերլուծական համադրության:
3. Կադաստրային և շուկայական արժեքների համեմատական վերլուծությունը ներկայացված է, սակայն դրա արդյունքների տնտեսական մեկնաբանությունը կարող էր ավելի խորացված լինել: Մյուս կողմից «Շուկայական արժեք» և «շուկայական գին» առանցքային եզրույթներն օգտագործվում են տարբեր հատվածներում՝ առանց հստակ տարբերակման, մինչդեռ գնահատման տեսությունում դրանք ունեն որոշակի տարբեր իմաստներ:

Տեխնիկական բնույթի դիտողություններ

4. Ներկայացված քարտեզների ձևավորման մեջ առկա են որոշակի թերացումներ, մասնավորապես. ա/Քարտեզների մասշտաբների և ընդհանրացման մակարդակի ոչ հստակեցում, բ/Քարտեզագրական պրոյեկցիայի և կոորդինատային համակարգի բացակայություն կամ ոչ լիարժեք ներկայացում և գ/Լեգենդների և պայմանանշանների ոչ բավարար մշակվածություն: Մեր կարծիքով այս բացթողումների լրացումները կարող էին էականորեն բարձրացնել քարտեզների հետագա գործնական օգտագործման նշանակությունը:
5. Աշխատանքի որոշ հատվածներում հանդիպում են լեզվական և խմբագրական անհարթություններ, ինչպես նաև եզրույթների ոչ ամբողջությամբ միատեսակ

կիրառություն, օրինակ՝ «Կադաստրային գնահատում» և «կադաստրային արժեքի որոշում» -ը որոշ հատվածներում կիրառվում է որպես գործընթաց («գնահատում»), իսկ այլ տեղերում՝ որպես արդյունք («արժեքի որոշում»), առանց հստակ տարանջատման կամ «Գյուղատնտեսական նշանակության հողեր» և «գյուղատնտեսական հողեր», օգտագործվում են փոխարինարար, սակայն գիտական աշխատանքում ցանկալի է պահպանել մեկ միասնական ձևակերպում:

6. Աղյուսակների և նկարների ձևավորման մեջ տեղ-տեղ նկատվում են անհամապատասխանություններ (հղումների և համարակալման մեջ), ինչը կարող է դժվարացնել նյութի ընկալումը, օրինակ «Աղյուսակ 5.1»-ում ներկայացված տվյալների կառուցվածքը ամբողջությամբ համահունչ չէ վերնագրին. սյունակների վերնագրերը և միավորները (սմ, բալ) տեղադրված են խառն ձևով, իսկ հայերեն և ռուսերեն նշումները («Тип почвы», «Наименование») կիրառված են միևնույն աղյուսակում՝ առանց միասնական ձևաչափի: Որոշ դեպքերում աղյուսակների կամ տվյալների ներկայացումը չի ուղեկցվում հստակ հղումով («տես աղյուսակ ...»), կամ հղումը չի համապատասխանում ներկայացված նյութին, ինչի պատճառով ընթերցողը դժվարությամբ է գտնում համապատասխան տեղեկատվությունը:
- Նշված դիտողությունները հիմնականում կրում են կատարված աշխատանքի բարելավման բնույթ և չեն նվազեցնում ատենախոսության ընդհանուր բարձր գիտական արժեքը:

Եզրակացություն

Ամփոփելով դոկտորական ատենախոսության բովանդակությունը հանգում ենք հետևյալ եզրակացության: Աշխատանքում ներկայացված տվյալները հաստատվել են կատարված գիտական հետազոտությունների արդյունքում, իսկ առաջարկվող միջոցառումների կիրառումը հնարավորություն կտա լուծել ՀՀ տարածքի հողակադաստրային շրջանացման և գյուղատնտեսական նշանակության հողատեսքերի կադաստրային գնահատմանը վերաբերող հարցերը:

Սամվել Զալիբեկի Կրոյանի ատենախոսությունը հանդիսանում է ավարտուն, ինքնուրույն գիտական աշխատանք, որն ունի տեսական և կիրառական նշանակություն: Աշխատանքը համապատասխանում ՀՀ ԲՈԿ-ի դոկտորական ատենախոսություններին ներկայացվող 8-րդ կետի պահանջներին, իսկ հեղինակը արժանի է Ե՝ Ե 23.06 մասնագիտությամբ տեխնիկական գիտությունների դոկտորի գիտական աստիճանի շնորհմանը:

Պաշտոնական ընդդիմախոս
աշխ. գիտ. դոկտոր, պրոֆեսոր

Սայադյան Հովիկ Յախշիբեկի

Սայադյան Հովիկ Յախշիբեկի ստորագրության իսկությունը
հաստատում եմ.

ՀՀ ԳԱԱ Ա. Թախտաշյանի անվան բուսաբանության
ինստիտուտի գիտքարտուղար,

Կ.գ.թ.

----- 

(կազմակերպության գիտ. քարտուղար)
ստորագրություն և կնիք)



Ա. ԼԱՇՆՅԱՆ